



Komunikado di Prensa 2020-026

Reakshon riba kobertura resien di ENNIA den medionan di komunikashon

Willemstad/Philipsburg – Komo reakshon riba sierto kobertura resien den medionan di komunikashon, *Centrale Bank van Curaçao en Sint Maarten* (CBCS) ke duna e siguiente informashon.

Na komienso di yüli di 2018, riba petishon di CBCS, Korte di Promé Instansia di Kòrsou a dekrétá un areglo di emergensia relashoná ku, entre otro, ENNIA Caribe Leven N.V., ENNIA Caribe Schade N.V. i ENNIA Caribe Zorg N.V. (ENNIA). Sr. Ansary a apelá e desishon akí via diferente kaso den korte i a pèrdè tur e kasonan akí. US Bankruptcy Court na New York tambe a rekonosé e areglo di emergensia i a rechasá Sr. Ansary su defensa kontra esaki. Pues, legitimidat di e areglo di emergensia ta fuera di duda.

A dekrétá e areglo di emergensia kontra dos otro empresa tambe: ENNIA Caribe Holding N.V. i EC Investment N.V. E dos institutonan akí no tabata bou di supervishon di Banko Sentral i, debí na esei, ta te despues ku e areglo di emergensia a drenta na vigor, por a haña un bista di magnitud di e problemanan.

Despues di un investigashon ekstenso, a determiná ku ENNIA a sufri daño na balor di por lo ménos NAf 700 mion komo resultado di mal maneho di esnan ku poder di desishon (entre otro tim di maneho) i akshonistanan, kendenan deliberadamente a hasi uso di struktura korporativo no-transparente i entidatnan ku no ta bou di supervishon di Banko Sentral. Awor, ENNIA ta eksigiendo kompensashon di e daño akí via un proseso di responsabilidat den korte ('aansprakelijkheidsprocedure') entamá mediante un petishon entregá dia 11 di òktober 2019. Dia 28 di sèptèmber, 2020, kasi un aña despues, Sr. Ansary a reakshoná, den e proseso akí den korte, riba e evidensia i e basenan pa e alegashonnan ku a keda presentá den e petishon.

CBCS semper ta dispuesto pa partisipá den negociashon serio pa yega na un akuerdo. Den e último añanan, a deliberá ampliamente ku Sr. Ansary na diferente okashon (tantu promé komo despues ku e areglo di emergensia a drenta na vigor). Sin embargo, te asina leu, Sr. Ansary no a hasi niun intento pa

yega na un proposishon konkreto pa un akuerdo, apesar di a dun'e diferente oportunidat al respekto. Si Sr. Ansary bin ku un proposishon konkreto i realístiko pa yega na un akuerdo pa kompensashon di e daño ku ENNIA a sufri, CBCS ta kla pa papia.

Banda di esei, CBCS ta sigui traha duru, huntu ku ENNIA su tim di maneho, pa kumpli ku e mandato legal pa restrukturá ENNIA.

Willemstad, 30 di sèptèmber di 2020

CENTRALE BANK VAN CURAÇAO EN SINT MAARTEN